





疊山先生文集序

文章非辭藻要皆本於德也德而文則可以扶世道  
立綱常人之德亦資以成歟苟徒文則辭焉爾不猶  
空青水綠於世何用哉此惟宋故疊山先生文節謝  
公之為文無一不本於德鑿鑿乎如穀粟布帛世不  
可無也始公仕宋適丁季世即倡大義以詆權姦提  
孤軍以保封疆及事不濟妻子弟姪併死于獄亦無  
顧卹宋既替命而猶拳拳以宗社為念志欲存趙氏  
之孤守孤竹之操故其遲回盖有待焉奈何失身之  
臣不諒公之心欲假以自揜百計誘公事元力拒不

起至有執公就道遂不食彌旬直抵燕京而絕嗚呼  
公之死可謂從容就義矣世但知公之忠而不知有  
其孝也昔公之尊考嘗倅潯以事忤董使者被劾以  
死暨公登第而董執政公誓不與相見竟不臺叅以  
歸日以奉母為事務得懽心雖值喪亂輒棄妻子躬  
負以逃此公忠孝之德出于天性故其形於著述者  
有易詩書三傳諸書行于世人皆誦之無庸議矣惟  
雜著詩文六十四卷藏于家屢經兵燹存者無幾而  
予友監察御史黃君溥澄濟與公同鄉邑慨公之文  
散逸恐泯泯無傳乃多方采輯得若詩若文總如十

篇正其訛謬各以類歸釐為十六卷間以示予曰惜  
乎先生之文僅此豈以少而自私乎將繡梓以傳乎  
盍叙諸予讀而嘆曰大鈞播物罔間鉅細夫以一草  
木之微足以識造化之理公之為文一字一語悉忠  
孝之所發即是足以見公之德而能感人於千載之  
下如讀上程雪樓書則孰不興夫孝而世之忘親奪  
情者始見為不仁讀上劉忠齋書則孰不慕乎忠而  
世之棄君保身者始知為不義其餘諸作無一不在  
是所謂扶世道植綱常以成人之德者誠有賴焉此  
固不可無尤不必多也雖然公以孤臣特立於北風

雨雪之間斷蓬殘葉幾何而不危乃欲屹砥柱於中  
流回狂瀾以東注千挫萬磨愈剛愈勁則公之忠誠  
可以貫天地薄日月其文章留於宇宙者上而為祥  
麟威鳳下而為芝草琅玕有不待是而后傳夫以御  
史君之及此者蓋其風節有得於公以之而資化本  
也雋以斗筭輒敢僭踰者謬持區區以附泰山之毫  
芒也公諱枋字君直壘山其自號文節其門人私謚  
也信之弋陽人其出處大節與夫行義之詳具于本  
傳與神道碑云  
景泰五年甲戌歲夏六月後學廬履劉雋克彥拜書



壘山集目錄卷之一

詩

七言絕句

思親 五首

送陳楚翁遠遊

五星

戲道士阮太虛

謝送夏衣

贈儒醫陳西岩

覓茶



代上杜按察 三首

寄謝林魯 三首

元旦阻雨 二首

春日聞杜宇

謝惠楮衾

桃

贈畫士劉信可 二首

物體

竹

扇

菊

賦松

與魏梅墅

花影 絕粒偶書二首

豐山集卷之二

五言八句

古詩贈相士吳楚峯

贈宋相士

求紙衾

贈相士郭少仙

送張子高歸延平

送劉治中之信州

七言八句

示兒二首

代上張經歷

贈卜者魏易齋

題東觀壁二首

和曹東谷韻

和葉愛梅韻

葉愛梅詩

和游古意韻

游古意詩

和毛靜可韻

毛靜可詩

和詹蒼崖

初到建寧賦詩一首

魏天應和韻

蔡正孫和韻

二劉兄惠寒衣

附錄

七言八句

送疊山先生北行

陳達翁建安泉石 二首

門人王濟淵道可 一首

門人張子惠 一首

挽疊山先生

洪平齋 一首

趙澗邊 一首

和道士陳天隱 三首

疊山集卷之三

五言長篇

謝劉純父惠木棉布

謝張四居士惠紙衾

謝客惠米線

謝人冬至送鴨酒

乞醯

謝黃禪師華嚴會惠供食

贈道士阮太虛何存齋

七言長篇

菖蒲歌

荆棘中杏花

贈何古梅學醫

贈畫梅吳雪塢

謝藥

謝惠樹醬等物

謝麪

崇真院絕粒

詞調

寒食鄆州道中 沁春園調

疊山集卷之四

書

上程雪樓御史書

上丞相劉忠齋書

與叅政魏容齋書

與楊石溪書

疊山集卷之五

書

與李養吾書

與建寧路母府判薦朱山長

與劉秀岩論詩

為蔡文節公子孫免差科書

與天師張簡齋書

與道士桂武仲

薦寫神黃鑑堂

與菊圃陳尚書劄

疊山集卷之六

疊山序

送史縣尹朝京序

送方伯載歸三山序

送黃六有歸三山序

交信錄序

程漢翁詩序

重刊蘇文忠公詩序

贈地理楊南川序

觀音經序

疊山集卷之七

記

寧庵記

東山書院記

圓峯道院祠堂記

擎天巖記

宋辛稼軒先生墓記

壘山集卷之八

墓銘

平山先生毋制機墓銘

壘山集卷之九

說

秋旦說

江仲龍字說

鷺洲書院記跋

大學解義跋

蕭水崖詩卷跋

壘山集卷之十

啓

代宗臣正啓

代賀丞相正啓

代干丞相免追筭功賞錢糧啓

代干執政薦舉啓

代干上司公庇啓

代干丞相遷除啓

代干杜按察追索書板啓

謝宋亦山惠米啓

謝人惠紙衾啓

謝惠醋啓

賀蔡芳源判鎮為道士啓



疊山集卷之十一

啓狀 宋布山惠朱啓

聘啓 聘定啓

回定啓 五月 七月請期啓

回啓 八月請期啓

回啓 九月請期啓

回啓 十月請期啓

回啓 十一月請期啓

回啓 十二月請期啓

回啓 未允

疊山集卷之十二

劄 通王判劄

通王判劄

回主簿交代劄

詞 薦父青詞

薦父青詞

頌

吾友張四居士為僧敢獻善頌

疊山集卷之十三

表 表賀文天

賀玄天上帝生辰表 三月三日 又

許旌陽飛昇日賀表

疊山集卷之十四

疏

梅野起居疏

城隍疏

鳳林新建蓮堂疏

景祐直君生辰疏

福善王生辰疏

化道衣疏

暨公聖者生辰疏

重建觀音寺疏

甯溪蓮社道堂脩諸天閣疏

洪山廟照華嚴第十五會

東山白蓮堂脩造疏

永福堂塑佛像

仁壽堂化粧塑佛像疏

東嶽廟粧塑天堂地獄閻羅像疏

白蓮社經堂疏

疊山集卷之十五

文

代五顯廟巫祝為還願人放罪文

代昭懿廟巫祝為婦人還願放罪文

疊山集附錄卷之十六

上疊山先生書

疊山先生行實

文節先生謝公神道碑宋史列傳

讀疊山北行詩跋

祭謝疊山文

褒崇忠節奏詞

文

疊山集目錄

疊山集卷之一

里生潭石黃溥編

絕句

思親五首

壬午九月寄書老母

九十萱親天下稀十年甘旨誤庭闈臨行有懇慈心喜再親衣冠兒便歸

九十萱親天下稀吾王何在子何之倚閭日暮無他念一片好心天得知

九十萱親天下稀人無容力荷天慈衣冠禮樂江東聚此是癡兒奉母時

九十萱親天下稀平生教子欲何為楚王肯立韓公

子良也歸韓亦有辭  
九十堂親天下稀  
教兒只誦白華詩  
溪水山玉人無愧  
百拜慈闈喜可知

代上杜按察三首

東南官吏欠清風  
五十年来世道窮  
須信太平在今日  
人間又有杜祁公  
慶曆諸公開太平  
選賢按察救生靈  
當時只有一杜杞  
豈若先生真福星  
萬物寧無吐氣時  
平生愛誦杜陵詩  
如今天下知元結  
六百年間再見之

送程楚翁遠游

近日人傳庾嶺梅  
南枝落盡北枝開  
長安舊日元無此  
盡是江南人送來

寄謝叔魯三首

紅葉飄搖霜露清  
去年今日正同行  
夜來似與君相見  
明月一窓梅影橫  
一歲思君君不來  
君來我去久徘徊  
歸時只見留詩在  
在何日相逢暢好懷  
平生結客知心少  
亂世逢人笑口難  
近日老天頻送喜  
誰來對酒共清歡

五星

五緯煌煌聚在秦項王稱霸沛公臣誰知四百年天下已屬寬仁大度人

元旦阻雨二首

洪鈞一轉歲開端草木羣生亦喜懽安得明年此時節江東重覩舊衣冠

莫道新年賀客遲晴天暖日却相期春風只被多情苦紅嫩青新總要詩

戲道士阮太虛

阮郎正好住天台玉女多情忍放回雨散雲收一天

碧薰風吹夢到瑤臺

春日聞杜宇

杜鵑日日勸人歸一片歸心誰得知望帝有神如可問謂余何日是歸期

謝送夏衣

南州久客困炎歊汗浥春衫上白毛細葛含風常著看此情猶勝舊裨袍

謝惠楮衾

吳宮金蹙鳳花綾春暖熏籠換水沉那似冰橋楮夫子滿床明月解微吟

贈儒醫陳西巖

猪苓桔梗為奇藥  
龍書囊用有時  
莫把眼前窮達論  
要知良相即良醫

桃

尋得桃源好避秦  
桃紅又見一年春  
花飛莫遣隨流水  
怕有漁郎來問津

覓茶

茂綠林中三五家  
短墻半露小桃花  
客行馬上多春日  
特扣柴門覓一茶

贈畫士劉信可二首

毛穎摧鋒入墨池  
白雲窓下展烏絲  
乘君袖裏孤山月  
寫盡橫斜竹外枝  
譜係庭筠出管城  
育中千畝盡秋清  
兒童不悞揮毫意  
閑傍虛簷聽雨聲

竹

新篁娟娟如綠玉  
瀟然出塵澹無欲  
清風明月誰生  
張留得此君在空谷

扇

蒲葵也解歸掌握  
紉素未應捐篋中  
莫把暗塵沈明月  
好驅大暑來清風

菊

淵明豈但隱逸人  
淵明素懷諸葛志  
清香不獨占秋  
天  
菊潭一滴三千歲

賦松

喬松磊磊多奇節  
冬無霜雪夏無熱  
根頭更有千歲  
苓知誰可語  
長生訣

與魏梅墅

義熙陶令書甲子  
春秋仲尼尊天王  
孔明漢賊不兩  
立  
梁公寸念臣而皇

花影

重重疊疊上瑤臺  
幾度呼童掃不開  
剛被太陽收拾  
去  
又教明月送將來

絕粒偶書二首

丹府金童善主家  
百神聽命靜無譁  
從今何必餐松  
栢  
但吸日精吐月華

龜銜甘露爭先到  
鳳吸醴泉隨後來  
投在太清仙酒  
甕  
道人日飲兩三盃

豐山集卷之一

疊山集卷之二

里生潭石黃溥編

五言八句

古詩贈相士吳楚峯

世亂異人出高者為神仙方術皆救世可知愚與賢  
喜君風鑒別妙處不可傳着眼看福人要識太平年

贈宋相士

墮甌者無益乘軒計亦踈恐貧吾自解過論子姑徐  
但得耆而艾飽觀詩與書時乎一盃酒此外儘從渠

求紙衾

避世知無地危身只信天寧持龔勝扇不着挺之綿



養性真同道知心有宿緣紙衾加惠絮晴日卧雲邊  
贈相士郭少仙

宗蘭生深林澹泊一點芳江梅倚脩竹醞藉萬斛香  
氣骨抱金玉精神貯冰霜若以色見我照紅還海棠  
送張子高歸延平

亂世讀書少前人教子難青燈嘗合席紅葉趨歸鞍  
悔自知春近松應耐歲寒樓高新月好後夜與誰看

送劉治中之信州峯

冰玉古溪山治中今士元邦人敬文簡道化望魯孫  
朱子書堂在東萊講席存十年儒道晦此日喜登門

七言八句

示兒二首

門戶興衰不自由樂天知命我無憂大兒安得孔文  
舉生子何如孫仲謀天上麒麟元有數人間豚犬不  
須愁養男不教父之過莫視詩書如寇讎

千古興亡我盡知一家消息又何疑古來聖哲少才  
子世亂英雄多義兒靖節少陵能自解孔明王猛使  
人悲只虞錯改金根字焉用城南勸學詩

代上張經歷

中原自古多豪傑晉國尤多賢大夫學問斷無虛議

論功名須有大規模臂間弓矢真良將舌底詩書笑  
腐儒自恨兩賢相識晚不妨盃酒恣歌呼

贈上者魏易齋

伯陽曾著易參同奪盡陰陽造化功白玉五城人可  
到黃金一鼎道無窮先生救世心良苦後派多才命  
必通魏本大名名易顯子明且爲筮江東

題東觀壁 二首

觀外好看船往廻觀中幾度見槐開常瞻紫炁青牛  
去又帶白雲黃鶴來天地無情搔短髮古今多變付  
殘盃醉中尚有醒時眼不信玉山人可推

老樹猶能識道回好懷長對碧天開青山綠水何人  
管明月清風要我來少日曾聞黃石教平生幾擲左  
慈盃道兄慣見人間事快抱棊枰信手推

和曹東谷韻

萬古綱常擔上肩脊梁鐵硬對皇天人生芳穢有千  
載世上榮枯無百年此日識公知有道何時與我詠  
遊仙不為蘇武即龔勝萬一因行拜杜鵑

和葉愛梅韻

消逢患難正當行禮食從來孰重輕綠髮行藏堪檢  
點白頭去就要分明了知死別如龔勝未必生還似

子卿緯地經天文不喪許君獨擅大聲名

后土茫茫兩屨行綱常事重此身輕大江有士一

人半千載見君雙眼明俯仰元無愧今古英雄何

必盡公卿早知莫買成都卜省得人知大隱名

右葉愛梅詩

和游古意韻

死易程嬰豈不知十年死後來為非文辭未必改秦

甥左傳取曰事敲朴徒能抱御衣無志何勞悲廟黍

此言離黍一詩忠矣然畧無與周之志與文也得仁更

不食山薇之諫幼受教先人武王太公周公一聞扣馬

與滅繼絕以謝天下以係人心故立武庚為殷王盡

自商畿內之地姑命三井以監之其王者位号尚如

故與周並立至三監挾淮夷叛始殺武庚始降王為

公黜殷命而封微子於宋故周書曰用告商王孔子

序書曰成王既黜殷命殺武庚命微子啓代殷後可

見前此殷命未絕殷王如故伯夷雖采薇西山見周

家能悔過遷善雖死無怨并薇蕨不食而死之故孔

子曰求仁而得仁又何怨先君子云此說聞之韓淵

泉解儒冠有愧一廝養臣張耳陳餘傳何忍葵心對

落暉  
消腔忠孝有天知不管人間事已非萬里乾坤雙  
草履百年身世一麻衣行藏自信床頭易卧病惟  
食隴首薇倘過宗周見離黍幾多新淚向殘暉

右游古意詩

和毛靜可韻

孟韓相慕久懸懸恨不論詩早十年吾道不行知有  
命斯文將喪更由天此生何恨為龔勝來世誰能知  
少連不信無人扶宇宙是邦豪傑已林然

一襟書傳日星懸湖海聲名五十年事不求知惟  
此理文之未喪豈皆天人方驚怪歐陽下我獨悲  
傷魯仲連看鏡倚樓秋已暮風巾霜履重依然

右毛靜可詩

和詹蒼崖韻

八閩英傑盛如林安得三忠存至今舊俗風流千載

事精忠大義一般心早知平陸風波惡何必巔崖雲

霧深此日春梁非鐵硬小顏拳爪定相侵謂雲峯起義

初到建寧賦詩一首

魏參政執拘投北行有期死有日詩別妻子

良友良朋

雪中松栢愈青青扶植綱常在此行天下久無龔勝  
潔人間何獨伯夷清義高便覺生堪捨禮重方知死  
甚輕南八男兒終不屈皇天上帝眼分明

豐翁老師將有行賦詩言別綱常九鼎生死一  
毛慷慨激烈高風凜然真可以繫綱常

足患痼疾莫能往  
媿矣斐然拜和未知  
萬疊青山只麼青  
何畏舉世隨流我獨清  
義死生輕吾翁鐵脊文翁  
先生心事炳丹青  
橘隱首陽粟不似  
為世重輕安得寒泉

右門人建安梅堃

疊翁老師因行賦詩讀其辭而心慕

神昭布森列不可誣也為之感慨激烈正係辱  
在師門弟子之職敢不拜一語以激揚先生之  
義氣用韻斐然

山色愁予渺渺青平生心事杜鵑行霜鬢雪虐天  
終定歲晚江空水自清肩上綱常千古重眼前榮  
辱一毫輕離明坤順文箕事此是先生素講明

右門人蒙齋蔡正孫和韻

辭洞齋華父二劉兄惠寒衣

離羅肉阱何損麒麟反君事讎忍為狗彘凡  
勸吾入燕吐膏中不平而後死者皆非忠於

謀人者也南八男兒死爾不可為不義屈豈  
敢曰將以有為乎平生學問到此時要見分  
明辱惠寒衣義不當受大顛果聰明識道理  
宵中無滯礙何必受昌黎先生衣服為別耶  
小詩寫心謾發一笑

平生愛讀龔勝傳進退存亡斷得明范叔綈袍雖見  
意大顛衣服莫留行此時要看英雄樣好漢應無兒  
女情只願諸賢扶世教鐵夫含笑死猶生

附錄

七言八句

送疊山先生北行

流落崎嶇十二年幾回灑血柱鵲前一雙芒屨乾  
坤窄萬古丹心日月懸按上靈龜元不食樊中孤  
鶴且安眠逃名不得名終在行止非人亦有天

又陳達翁建安泉石

孤忠不忘綉衣時跣足佯狂老亂離鸚鵡可能逃  
圈網麒麟能肯受鞭羈半生苦被名相誤萬里甘  
將死自期今日如公能有幾此身無媿作男兒

送疊山先生北行

希夷何意出山中心事當年漢卧龍行止但憑天

仙山集卷之二  
七  
侑主別離初不淚沾霄定知晚菊能存節未必寒  
松肯受封大義昭明千載事前程儘更好從容

右門人王濟淵道可

打硬脩行三十年如今證驗做儒仙人皆屈膝甘  
為下公獨高聲罵向前此去好憑三寸舌再來不  
直一文錢到頭畢竟全清節留取芳名萬古傳

右門人張子惠叔仁

挽疊山先生

洪平齋

千古精忠日月光恨無麟筆寫堂堂還家耻作梁  
江總辟穀誰知韓子房後死十年應有待輕生萬

里故非狂有兒可拾江邊骨須信人亡道不亡

又

趙澗邊

西山東海莫容身芒屨蕭蕭萬里塵去住更無寬  
歲月死生惟有一君親丹心故國紅雲冷白骨他  
鄉塞草春不是回頭春已暮至今猶說似痴人

和道士陳天隱三首

明知儒道本同流未了因緣不自由紫府寒陽隨念  
到紅塵辛苦幾時休精神嘗與天來往軀殼不知誰  
滯留穹壤豈無陸脩靜知君認得故吾不

豈不逍遙自采真世間何地可容身碧潭秋月元無

物麗日祥風只愛春天上儘多知己友塵中安得見  
心人赤虬一躍蓬萊近又恐丹丘有宿因  
學道無魔道不成神人得計是無名光風自覺長蕭  
灑明月何曾有死生早悟梅山難養性何如福地別  
尋盟梅花香裏堪聯句莫笑人間石鼎鳴

疊山集卷之三

里生潭石黃溥編

疊山集卷之三

五言長篇

謝劉純父惠木綿布

嘉樹種木綿天何厚八閩厥土不宜桑蚕事殊艱辛  
木綿收千株八口不憂貧江東易此種亦可致富殷  
奈何來瘴癘或者畏蒼昊吾知饒信間蚕月如岐邠  
兒童皆不帛豈但奉老親婦女賤羅綺賣絲買金銀  
角齒不兼與天道斯平均所以木綿利不畀江東人  
避秦衣木葉矧肯羞懸鶉天下有元德孔融願卜鄰  
縹袍望不及共裘志自仁贈我以兩端物意皆可珍



潔白如雪積屢密過綿純羔縫不足貴狐腋難擬倫  
絺纈皆作貢此物不薦陳豈非神禹意隱匿遺小民  
詩多草木名箋疏欲諄諄國家無楚越欲識固無因  
剪裁為大裘窮冬勝三春拜嘉重感激觸物尤酸辛  
吁嗟彼寒谷鄒律今不神三宮坐穹廬雨雪或十旬  
安得遺此惠飛到君王身塞上寒墮指挾纈誰為溫  
人各賜兩端費銀二萬斤大軍四十萬談笑却胡塵  
感君道義交何異骨肉親可與知者道眾人笑且嗔  
至案未能報瓊琚情則真春秋二百年幣交幾君臣  
季札有贈好千古尚如新

謝張四居士惠紙傘

何年擣玉楮瑩潔無滓近清興厭純綿安有塵可振  
夜卧白晝中冰雪心不紊寤覺梅花香爐紅絕煙煜  
疑到玉皇前俯視日月暈人間綺羅帳何異錦覆糞  
吾慕忍寒人從師游魯隣爵祿不可辭高舉已在汶  
獨憐無褐民茅簷凍欲債大裘正萬丈德心欠廣運  
天下皆無寒孔孟有素蘊願與物為春衾鉄吾不慍  
以君志趣高惠我無俗韻縞帶報紵衣倚札真契分

謝人惠米線

玉粒百穀王有功滿人寰春磨作瓊屑飛雷落九關

翁張化瑤線弦直又可彎湯鑊海沸騰玉龍自相投  
銀濤滾雪浪出沒幾旋漂有味勝湯餅飲歌不愁瘵  
包裹數十里瑩潔無點班與師遠持糲此物正可須  
千萬一日飽不費金數錢長安權貴人五鼎斲笑顏  
玉食過九重恨無土宇版豈知有瓊糜天雨到市闌  
願獻空峒帝馬迷龍難攀

謝人冬至送鴨酒

陽復且閉關萬物畏坤含雙鳧飛天外鷺食何貪婪  
儒道又一泰十年亂愈餓誰家讀書堂庭階無青廡  
此時談詩書蓮經提魚籃平生太玄文知者無一譚

之子愛野鷺驥駒舞兩駮厚顏酒食饌不獵懸鶉鷄  
寒威甚毒矢三盃勝七釂爛醉尋梅花登峯吾尚堪

乞醃

平生忍酸寒鼻吸醋三斗先民耻乞字乞醃良可醜  
賣鷄買魚烹鷄魚誰舍取將為水晶鱠聊悅苦吟口  
主人曰無醃調和只宜酒一夜嚴霜寒池冰堅可扣  
誰知酒不冰流斯魚可走旁觀粲然笑易牙知此否  
始知五味和醃酸必相有提壺我有求君甕肯發醜  
宿諾惠未來望梅渴已久似聞君釀醃巧心出楊柳  
楊柳屬他人腸斷香山叟舉瓢酌醃時又憶玉纖手

一顧一心酸淚珠滿翠袖此亦人至情何不告朋友  
古人有乞漿得酒意愈厚又恐酒俱來太歲正在酉

時乙酉歲

### 謝黃禪師華嚴會供食

十兆九萬拜求道心如快毗盧頂上珠直欲一手探  
天厨送誰饌衆腹豈敢貪君有維摩心作蜜憐吳蚕  
八萬四千供只須丈室函昔我聞晨鍾今載草堂柵  
流年急如梭長歌愧僊藍勇尋趙州關何畏白髮繁  
願為護法輪金甲持長鎗又恐回道人晚遇黃龍南  
贈道士阮太虛何存齋

六道四生苦何人不煩惱官人自做官道人自脩道  
相逢不下馬各自尋蓬島前生非親契今生如何好  
本來無因緣安得有果報來非人捉來到是天送到  
我若不呈醜道教一齊倒春風縛不住秋月蝕愈皎  
莫登時貴門談天恨欠早對面不相識開口便激惱  
譬如弄雜劇徒取傍人笑道我是風顛知我已明了  
莫愁我饑渴天厨食自飽真宰善解家未敢與人道

### 七言長篇

### 菖蒲歌

有石竒峭天琢成有草夭夭冬夏青人言菖蒲非一

種上品九節通仙靈異根不帶塵埃氣孤操愛結泉  
石盟明恣淨几有宿契花林草砌無交情夜深不嫌  
清露重晨光疑有白雲生嫩如秦時童女登蓬瀛手  
携綠玉杖徐行瘦如天台山上聖賢僧休糧絕粒孤  
鶴形勁如五百義士從田橫英氣凜凜磨青冥清如  
三千弟子立孔庭回琴點瑟天機鳴堂前不入紅粉  
意席上常聽詩書聲惟石篠蕩皆兒貢此物舜廟當  
共登神農知已入本草靈均蔽賢遺騷經幽人耽翫  
發仙輿方士服餌延脩齡綵鸞紫鳳琪花苑赤虬玉  
麟芙蓉城上界真人好清淨見此靈苗當大驚我欲  
携之朝太清瑤草不敢專芳馨玉皇一笑留香案錫  
與有道者長生人間千花萬草儘榮艷未必敢與此  
草爭高名

荆棘中杏花

牆東荒蹊抱村斜荆棘狼籍盤根芽何年丹杏此留  
種小紅濺濺爭春華野人慣見謾不省獨有詩客來  
咨嗟天真不到鉛粉筆富艷自是宮闈花曲池芳逕  
非宿昔蒼苔濁酒同天涯京師惜花如惜玉曉檐賣  
徹東西家杏花看紅不看白十日忙殺遊春車誰家  
園裏有此樹鄭重已着重幃遮阿嬌新寵貯金屋明

妃遠嫁愁清笳落花紫簾拂床席亦有飄泊沾泥沙  
天公無心物自物得意未用相陵誇黃昏人歸花不  
語惟有落月啼棲鴉

贈何古梅學醫

永州何仙藥最靈神丸能潰邕州城廣西兩道再清  
平百萬赤子荷更生笙鶴一去三百年東南忽變為  
腥膻為血為肉生靈苦在者瘡痍何日痊上界真人  
有同性不學神仙學孔孟有術醫國無人知要為吾  
民救微命察脉肥瘠韓子精論疾陰陽子產明神功  
端不讓思邈古道依然如宋清得錢膏藥少取利無

錢乞藥喜捨施好客來時入酒鑪無朋終日閱書市  
憶昔民生三皇前下壽無疾享百年神人妙用不可  
見本草靈素猶有傳古云醫不通三書世上斷不服  
其藥如君膏中有炎黃冷笑三書盡糟粕我聞上帝  
最好生活人功多朝玉京請看岐史至陶葛神仙多  
是良醫成東南干戈二十秋人無貧富眉長愁千人  
幸有一人在到處呻吟無歌謳遺黎若要家平康但  
願良醫自天降不龜手藥有靈時好看良醫作良相

贈畫梅吳雪塢

吳君雪塢善畫梅竹曾次爽豁所交多賢人梅竹

其所好雪塢其所居穹壤間如有五更風雪夜當  
門獨立人必能知吳君之不凡矣廣信謝枋得贈  
之詩曰

冷凝寒極雪漫漫天下無人知袁安起來門前問梅  
竹吾友可以話歲寒歲寒心腸似鐵石不與萬木同  
摧殘有時醉中畫梅竹洪鈞只在掌握間人生莫與  
天爭巧上帝一見開笑顏八極俗物不足道千年陳  
人無可觀誰人奈得此雪過春風去後終須還千紅  
萬紫爭爛熳梅竹携手隱空山臯陶庭堅不祀苦程  
嬰杵曰存孤難豈無當門獨立者五更風雪不相干

上帝慈仁須動念醒來紅日上三竿

謝藥

雪深不能鏡黃精天寒不能斲茯苓瑤草共食何日  
長還丹獨鍊何時成如來憐我似鶴形指揮龍樹露  
神靈佛無老死無生滅何用勞我以長生

謝惠栴醬等物

堇荼易地味不甘薑桂到老性愈辣人言申栴能變  
化我見苾芬終不滅古來郊廟薦德馨此物氣味通  
神明開口一笑露眼睛望君點化佛先成

孔子愛食蔬菜羹羹中無醬必不食先生執醬饋高

年此味環羞豈易得瓶中有粟豈過望誰憐陶令分  
嘉餉喜君不作無髮人免得東坡借播醬

謝麪

豐年自古說來年四月麥熟勝秋收天厨送食不待  
求有麪飢飽吾何憂安得化身為兒童戲沙作麪可  
報谷授記或為阿育王請鑄八萬四千塔

崇真院絕粒偶書付兒熙之定之并呈張蒼峰

劉洞齋華甫

西漢有臣龔勝卒閉口不食十四日我今半月忍渴  
飢求死不死更無術精神常與天往來不知飲食為

何物若非功行積未成便是業債償六畢太清羣仙

宴會多鳳簫龍笛鳴瑤瑟豈無道兄相提携騎龍直

上寥天一

寒食鄆州道中

沁春園調

十五年來逢寒食節皆在天涯歎雨濡露潤還思宰  
柏風柔日媚羞看飛花麥飯紙錢隻鷄斗酒幾誤林  
間噪喜鴉天笑道此不由乎我也不由他

鼎中鍊熟丹砂把紫府清都作一家想前人鶴馭常  
遊絳闕浮生蟬蛻豈戀黃沙帝命守墳王令脩墓男  
子正當如是邪又何必待過家上塚畫錦榮華

疊山集卷之三

疊山集卷之四

里生潭石黃溥編

書

上程雪樓御史書

十月朔日丁憂人謝枋得稽顙再拜奉書于雪樓御  
史中丞相公執事大元制世民物一新宋室孤臣只  
欠一死某所以不死者以九十三歲之母在堂耳罪  
大惡極獲譴于天天不勦厥命而奪其所恃以為命  
先妣以今年二月二十六日考終於正寢某自今無  
意人間事矣禮曰傷哉貧也生無以為養死無以為  
葬某幼讀此書何知其苦乃今身履之而後痛楚不



能禁其三十一而入仕五十一而休官平生實歷不  
滿八月俸祿無一毫歸家養親已不可言孝矣惟黽  
勉送死或可以少贖前過親喪在淺土貧不能禮葬  
苦塊餘息心死形存小兒傳到郡縣公文乃知○○  
欲求至誠無偽以公滅私明達治體可勝大任之才  
執事薦士凡三十賤姓名亦玷其中執事將隆旨督  
郡縣以禮聘召有願應詔者以資幣厚遣乘傳上京  
弓旌招賢輪帛迎士此禮不見於天下久矣豈非清  
明一盛事乎有志經世者孰不興起惜乎求異才而  
及其非其人非其人貽笑於天下取譏於後世非○○

憂上求賢之初意也揚善者順天薦賢者報國執事  
為君謀亦忠矣自燕京至上饒五千里當執事薦士  
時豈知其有母之喪衰經之服不可入公門草土之  
銜不可徹殿陛姓名不祥者不可辱古靈薦藁也稽  
之古禮子有父母之喪君命三年不過其門所以教  
天下之孝也解官持服在大元制典尤嚴自伊尹傳  
說之後三千年間山林匹夫辭烟霞而依日月者亦  
多矣未聞有冒哀匿服而膺幣聘者傳曰求忠臣必  
於孝子之門為人臣不盡孝於家而能盡忠於國者  
亦未之有也某親喪未克葬持服未三年若違禮背

法從郡縣之令順執事之意其為不孝莫大焉。○。○  
以道德仁義治天下取士必忠孝人有不葬其親而  
急於得君者人心何在天理何在非聖君賢相所忍  
聞也且夫至誠無偽以公滅私明達治體可勝大任  
三代而下真足當此選者惟諸葛孔明一人孔明居  
隆中執事生古郢皆荆楚奇才也孔明未遇時立心  
制行必有大過人者襄陽耆舊能言之此執事所熟  
聞亦執事所願學今天下果有人物髣髴孔明者乎  
有斯人應斯詔固世道之福亦儒道之幸光岳之氣  
久裂者未全六經之道久微者未昌置八紘羅六合

以求才老者怯而不可用壯者狂而不可信少者未  
成才而不可得姑取吉人善士以和光同塵當饋可  
無思拊髀可無歎野史記之曰甚哉上下之相蒙也  
此豈。○。所樂哉此豈執事所願哉語曰人豈不自  
知某自知不才久矣亡國之大夫不可以圖存李左  
車猶能言之况稍知詩書頗識義理者乎某之至愚  
極闇決不可以辱召命亦明矣當執事薦士時特不  
知某有母之喪耳倘知之必不以不祥姓名瀆旒冕  
執事豈不聞前朝之事乎淳祐甲辰丞相史嵩之父  
沒天子詔起復嵩之雖不來大學生叫閭闔而攻之

其詞曰天子當為國家扶綱常為天地立人極奪情非令典起復非美名朝臣惟徐忠公元杰上疏主正論力勸君父宜令嵩之終三年喪人心天理不可泯滅此嵩之所以壽終吉宋之所以幸存三十年也咸淳甲戌而後不復有禮法矣賈似道起復為平章文天祥起復為帥閻徐直方起復為尚書陳宜中起復為宰相劉黻起復為執政饒信斗管穿窬之徒鑽刺起復不可勝數三綱四維一旦斷絕此生靈所以為肉為血宋之所以暴亡不可救也豈非後車之明鑒乎忠臣論事必識大體君子取人先觀大節執事不

可稱匪其人而孤○○求才之意某不可進不以禮而誤執事知人之明不待智者而知之矣為人子止於孝為人臣止於忠某不能為忠臣猶願為孝子傳曰君子成人之美不成人之惡執事能亮某之心使某幸而免不孝之名是成我者之恩與生我者等也某家在弋陽執事僑寓盱江相望二百餘里當徒跣以謝門墻惟服色悽慘不可以謁達官貴人敢以書白于侍御者語曰士屈於不知已而伸於知已執事豈不聞某為江南一愚直人乎人無所不至惟天不可欺某所以發露真情而不暇文飾其辭者亦特執

事必知己也不備某稽顙再拜

上丞相劉忠齋書

七月吉日門生袁經謝枋得謹齋沐裁書百拜託友人吳直夫獻于內相尚書太丞相國公忠齋先生鈞座惟天下之仁人能知天下之仁人惟天下之義士能知天下之義士賢者不相知多矣能灼見三俊之心者必聖人也某自壬戌以後小夫竿牘不至門墻者二十七年孰不以為簡先生曰斯人也非我也必愛我也今天下能知某之心者孰有過於先生乎事有當言而不言則非所以耐知己某敢不避誅斥

而僭言之君子之所為必非衆人之所識湯可就桀亦可就必道義如伊尹者能之伯夷柳下惠不能也佛胗召可往公山弗擾召可往必聖神如孔子者能之曾顏閔不能也傳曰人各有能有不能先生之所能某自知某必不能矣○○本無滅宋之心郝奉使將命來南欲使南北百萬億蒼生同享太平之樂至仁也只此一念自足以對越上帝賈似道執國命十六年欺君罔上誤國殘民其惡不可一二數拘行人負歲幣滿朝無一人敢言其非兵連禍結亡在旦夕滿朝無一人敢聲其罪善類亦可自友矣天怒于上

人怨于下國滅主辱理固宜然天實為之人豈能救之哉○○之禮三宮亦可謂厚矣○○保全亡國之臣亦可謂有息矣江南無人才未有如今日之可耻春秋以下之人物本不足道今可求一人如瑕呂飴甥程嬰杵臼廝養卒亦不可得矣先生少年為倫魁晚年作宰相功名富貴亦可以酌素志矣奔馳四千里如大都拜見○○豈為一身計哉將以問三宮起居使天下後世知君臣之義不可廢也先生此心某知之天地鬼神知之十五廟祖宗之靈亦知之衆人豈能盡知之乎師友之相知古今寧幾人哉事有可

效忠於清朝者某不可不言先生亦不可不察近觀路縣及道錄司備奉尚書省指揮江淮行省叅知管公將旨來南根尋好人根尋不覩面皮正當底人此令一下人皆笑之何也江南無好人無正當人久矣謂江南有好人有正當人者皆欺○○也何以言之紂之亡也以八百國之精兵不敢抗二子之正論武王太公凜凜無所容急以繼滅興絕謝天下殷之後遂與周並立使三監淮夷不叛則武庚必不死殷命必不黜殷之位號必不奪微子亦未必以宋代殷而降為上公也多士多方依然不忘舊君者三十年

成王周公以忠厚之心消其不平之氣曰商王士曰  
有殷多士曰殷逋播臣未敢以我周臣民例視之太  
平君相待亡國臣民何如此其厚也豈非殷之舊國  
故都猶有好人猶有正當人乎唐人哀六國之滅者  
也妃嬪媵嬙王子皇孫辭樓下殿輦來于秦朝歌夜  
絃為秦宮久至今讀者猶惻楚六國臣子無一痛心  
刻骨亦可謂無久矣楚懷王不過一至愚極闇之主  
耳播弃忠直信任姦邪送死咸陽無足哀者楚人乃  
憐之如悲其親戚豈不曰楚本無罪不過弱而不能  
自立耳楚滅矣義陵一邑惓惓於舊君者惟一心扶

老携幼肥遯樵源後六百年兒孫尚不與外人相接  
以秦皇帝之威靈蒙恬蒙毅之智勇豈不能盡執楚  
人而拘之天常民彝不可泯滅姑留此輩以勸吾忠  
臣義士可也豈非楚之舊國故都猶有好人猶有正  
當人乎女真之破汴京也劫二帝據中原土地人民  
皆其有矣粘罕多智人也知地廣人稠未易心服一  
讀馮伸秦檜議狀為之動心變色亟思一策處之爾  
後南北戰者六七年女真之待二帝亦慘矣宋之臣  
子不敢置兩宮於度外也今年遣使祈請明年又遣  
使祈請今年遣使問安明年又遣使問安一使死於

前一使繼於後王倫一市井無賴狎邪小人耳謂梓宮可還太后可歸諸君子切齒怒罵終則二事皆符其言行人洪忠宣拘留燕山開門授徒室燃敬其忠信誠慤一日問之曰天下何時可太平忠宣曰息兵養民則太平又曰何如則可以息兵養民忠宣讀孟子齊宣王問諸侯救燕一章以對和聲琅誦曰天下固畏齊之強也今又倍地而不行仁政是動天下之兵也又讀孟子樂天畏天一章曰小國能畏天大國能順天室燃曰善哉善哉吾計決矣曾幾何時密授秦檜以江南稱藩國納歲幣之說而息兵養民矣女

真自丁未以後安處中原享國百有八年而宋自戊午至甲午偷安江南者九十七年非秦檜之功皆洪忠宣讀孟子勸室燃之力也豈非江左臣子猶有好人猶有正當人乎以某觀之江南無好人無正當人久矣求好人正當人於今日尤難某江南一愚儒耳自景定甲子以虛言賈實禍天下號為風漢先生之所知也昔歲程御史將旨招賢亦在物色中既披肝瀝膽以謝之矣朋友自大都來乃謂先生以賤姓名薦朝廷過聽遂煩旌招某乃丙辰禮闈一老門生也先生誤以忠實二字褒之入仕二十一年居官不滿

八月斷不敢枉道隨人以辱大君子知人之明今年六十三矣學辟穀養氣已二十載所欠惟一死耳豈復有他志自先生過舉之後求得道高人者物色之求好秀才者物色之求藝術人者物色之奔走逃遁不勝其苦中書行省魏參政之言勒令福建有官不仕人呈文憑根脚者又從而困辱之此非先生之賜而何然先生豈有心於害某哉大抵朝廷一番求賢不過為南人貪酷吏開一番騙局趁幾錠銀鈔欺君誤國莫大焉今則道錄司備參政管公將隆旨根尋好人不覷面皮正當人又物色及某矣某斷不可應

聘者其說有三一曰老母年九十三而終殯在淺土貧不能備禮則不可大葬妻子嬰婢以某連累死於獄者四人寄殯叢冢十一年矣旅魂飄飄豈不懷歸弟姪死國者五人體魄不可尋遊魂亦不可不招也凡此數事日夜關心某有何面目見先生乎此不可應聘者一也二曰有天下英主必能容天下之介臣微介臣不能彰英主之仁微英主不能成介臣之義某在德祐時為監司為帥臣嘗握重兵當一面矣荆通對高祖曰彼時臣但知有齊王韓信不知有陛下也滕公說高祖曰臣各為其主季布為項羽將而盡



力乃其職耳項氏臣可得而盡誅耶某自丙子以後  
 一解兵權棄官遠遁即不曾降附先生出入中書省  
 問之故府宋朝文臣降附表即無某姓名宋朝帥臣  
 監司寄居官員降附狀即無某姓名諸道路縣所申  
 歸附人戶即無某姓名如有一字降附天地神祇必  
 殛之十五廟祖宗神靈必殛之甲申歲○○降詔赦  
 過宥罪如有忠於所事者八年罪犯悉置不問某亦  
 在恩赦放罪一人之數夷齊雖不仕周食西山之薇  
 亦當知武王之恩四皓雖不仕漢茹商山之芝亦當  
 知高帝之恩况羹藜含糲於○○之土地乎○○之

赦某屢矣某受○○之恩亦厚矣若效魯仲連蹈東  
 海而死則不可今既為○○之游民也莊子曰呼我  
 為馬者應之以為馬呼我為牛應之以為牛世之人  
 有呼我為宋逋播臣者亦可呼我為大元游惰民者  
 亦可呼我為宋頑民者亦可呼我為○○逸民者亦  
 可為輪為彈與化往來垂臂鼠肝隨夫付子若貪戀  
 官爵昧於一行縱○○仁恕天涵地容哀憐孤臣不  
 忍加戮某有何面目見○○乎此不可應聘者二也  
 某受太母之恩亦厚矣諫不行言不聽而不去猶願  
 勉竭駑鈍以報上也太母輕信二三執政之謀挈祖

宗三百年土地人民盡獻之。○。○無一字與封疆之  
臣議可否君臣之義亦大削矣三宮北遷乃自大都  
寄帛書曰吾已代監司帥臣具姓名歸附宗廟尚可  
保全生靈尚可救護三尺童子知其必無是事矣不  
過給群臣以罷兵耳以宗社為可存以生靈為可救  
陽給臣民以歸附此太母之為人君自盡為君之仁  
也知宗社不可存生靈不可救不從太母以歸附此  
某為人臣自盡為臣之義也語曰君行令臣行志又  
曰制命在君制行在臣大臣者以道事君不可則止  
孔子嘗告我矣君臣以義合者也合則就不合則去

某前後累奉太母詔書並不回奏惟有繳申二王乞  
解兵權盡納出身以來文字生前致仕削籍為民避  
逃山林如殷之逋播臣耳聞太母上仙久矣比向長  
彌恨不即死然不能寄一功德疏如任元受故事今  
日有何面目捧麥飯洒太母之陵乎此不可應聘者  
三也今朝廷欲根尋好人不覩面皮正當底人某決  
不可當此選先生若以三十年老門生不背負師門  
為念特賜仁言為某陳情於江淮行省叅知管公願  
移關諸道路縣及道錄司不得縱容南人貪酷吏多  
開騙局脅取銀鈔重傷國體大失人心俾某與太平

草木同沾聖朝之雨露生稱善士死表於道曰宋處士謝某之墓雖死之日猶生之年感息報恩天實臨之司馬子長有言人莫不有一死死或重於太山或輕於鴻毛先民廣其說曰慷慨赴死易從容就義難先生亦可以察某之心矣干冒鈞嚴不勝恐懼戰慄之至

與參政魏容齋書

九月吉日前宋逋播臣○○游民謝某謹齋沐頓首致書于大參政公閣下大元制世民物一新宋室逋臣只欠一死上天降才其生也有日其死也有時某

願一死全節久矣所恨時未至耳○○慈仁如天不妄殺一忠臣義士雖曰文天祥被姦民誣告而枉死後來寬狀明白姦民亦正典刑其待亡國之逋臣可謂厚矣某雖至愚極蒙豈不知恩所以寧為民不為官者忠臣不仕二君烈女不事二夫此天地間常道也有伊尹之道有伊尹之志則何事非君何使非民若伯夷柳下惠則自知不能為伊尹決不敢學伊尹矣自丙戌程御史彌雪樓將隆旨宣喚之後今第五次蒙○○以禮招徠上有堯舜下有巢由上有成湯下有隨光上有周武下有夷齊某所以效虞人之死

而不往顧學夷齊之死而不仕者正欲使天下萬世知○○之量可與為堯舜可與為湯武能使謝某不失臣節視死如歸也茲蒙大叅相公拘管周先生道院日夜勞動錄事司吏卒十餘人及坊正屋主監守豈不憂某之逃走耶某是男兒死即死耳不可為不義屈何必逃走大叅相公憂慮亦太勞矣先民有言慷慨赴死易從容就義難某茲蒙大叅相公縶繼而到大都以縲絰見留忠齊諸公且問諸公容一謝某聽其為大元開民於大元治道何損殺一謝某成其為大宋死節於大元治道何益只恐前誤大宋後誤

大元上帝監觀必有報應諸公自無面目立於天地間某毋喪未葬據禮經不可除服只當縲絰見公卿凶服不可入君門○○有命當歷寫江南官吏貪酷生靈愁苦之狀作萬年書獻陛下一聽進退忠臣不事二君烈女不事二夫此某書中第一義也某自九月十一日離嘉禾即不食煙火今則并勺水一果不入口矣惟願速死與周夷齊漢龔勝同垂青史可以愧天下萬世為臣不忠者茲蒙頒賜仰見禮士之盛心某聞之食人之粟者當分人之憂衣人之衣者當任人之勞乘人之車者當載人之難某既以死自處

度此生不能報答恩遇矣義不敢拜受所有鈞翰臺  
餽事件盡交還來使回納使帑外郎又傳鈞旨云欲  
訪問某何事某初志亦願效一得之愚今則決不敢  
矣魯有公甫文伯死其母敬姜不哭室老曰焉有  
子死而不哭者夫其母曰孔子聖人也再逐於魯而  
此子不能從今其死也未聞有長者來內人皆行哭  
失聲閨中自殺者二此子也必於婦人厚而於長者  
薄也吾所以不哭君子曰此言出於母之口不害其  
為賢母也若出於婦人之口則不免為妬婦矣言一  
也所居之位異則人心變矣某義不出仕者也今雖

有忠謀奇計則人必以為妬婦矣恐徒為天下所笑  
惟相度容之干冒鈞嚴不勝悚慄

與楊石溪書

名以成字習之石溪號也白石人

枋得雲卧空山猶有雪夜思袁安者高誼今所無也  
執事共學寧幾時間遺數至僕亦可以愧矣施者猶  
未厭君子固過於厚乎宋朝盛時文章家非一人歐  
蘇起遐方僻壤以古道自任發為詞華經天緯地天  
下學士皆知所宗隱然挈宋治於兩漢之上七十年  
來文體卑陋極矣天運循環必有作者是不難亦為  
之而已矣枋得頗有興起斯文之意倡而無和言而

莫聽近來始得張伯大與習之兄弟能卓然自立不從俗浮沉豈特時文當為天下雄今之同志即後之同傳枋得深有望焉惜乎相聚之日淺所願切磋講究者十未二三私懷如有欠執事乃以為德何邪

疊山集卷之四

疊山集卷之五

里生潭石黃溥編

書

與李養吾書

某惟祖宗於舍選擢倫魁視進士上三恩數尤渥賜袍笏大成殿下即日授國子錄升崇化堂與兩司成衆學官序爵而坐不待親民而入朝固以執政宰相望之矣後雖渝初意失舊法西澗七年給札亦未為遲執事坐爐亭時聲名赫赫震京師諸老先生恨識面之晚出場屋以程文示同志皆心降辭服推讓為第一登名日果巍然冠羣英七年三優如執左契科

自由人重誰不以西澗芳躅期之恬退六年僅得一  
學官在外為漕司掾人皆曰不才宰相必不能容天  
下第一流人物當以養吾進退去就規之陸宣公有  
言興王之良佐皆是李世之棄才養吾不屈節受穹  
官於陳宜中留夢炎劉黻柄國之時吾知天地祖宗  
之意已有所屬宇宙大變一世無全人饒信持文之  
士勇為亂臣賊子者尤衆少康逃匿有仍氏者四十  
年宣王逃匿召公家者十有四年夏周諸侯公卿大  
夫背叛者不見於史策是何三代忠臣之多也養吾  
潔身全節於深山密林間屹然如黃河之有砥柱先

儒謂世有非常之變天必豫出非常之人以擬之吾  
於是有望矣藝祖皇帝最重讀書人天地折缺之餘  
正望其整頓人極傾顛之際正望其扶持在天之靈  
想亦不能忘情也子房不能存韓而歸漢孔明不能  
興漢而保蜀君子憐之今日之事視二子尤難愚公  
移山精衛填海取訕笑於腐儒俗吏鄙夫庸人固宜  
程嬰杵臼樂毅申包胥果何人哉天地間大事決非  
天地間常人所能辦使常人皆能辦大事天亦不必  
產英雄矣夷狄不可為諸夏之王古今未有絕正統  
之時使君臣上下同一豺狼蛇豕之心而可立國秦

始皇隋文帝必不再世而亡矣使五帝三王自立之中國而終為戎狄所滅使君無桀紂幽厲之惡而一廢不復興少康宣王東周蜀漢之事皆不可信矣人力終有窮天道終有定壯老堅一節終始持一心吾獨於養吾有望某嘗有言人可回天地之心天地不能奪人之心大丈夫行事論是非不論利害論逆順不論成敗論萬世不論一生志之所在氣亦隨之氣之所在天地鬼神亦隨之願養吾益白珍重儒者常談所謂為天地立心為生民立極為去聖繼絕學為萬世開太平正在我輩人承當不可使天下後世謂

程文之士皆大言無當也

與建寧路母府判薦朱山長

知公度量足以翕受一世之人物敢以士獻朱文公之後能世濟其美者亦罕矣四方善類幾年長太息某客閩十三年所交朋友能讀四書者儘多求其明辨力行真踐實履果無愧文公四書之教者惟泳道朱公沂一人癸未年初識之逆旅中狀貌與文公無異揖而問其姓字則文公曾孫也聽其議論覘其志趣絕似西北人無一點江南時文氣習遂為莫逆交每歲或一相會觀其論古今人物高下國家興廢善



類仕止久速之故掃盡華葉獨存根株使其老為太  
平民正謂胡瑗嘉祐真講官也生不逢時可為浩嘆  
乙亥已前侍從監司太守以遺逸薦者衆矣泳道皆  
不應聘某問其故則曰吾家如侍郎在總領鑑畿漕  
秘撰浚非不遇賢宰相以文公之故穹官膺仕如取  
諸寄終為一俗吏既無補於世道徒有忝於家聲此  
某所深愧也所以用力文字與郡國薦名必由科舉  
奮身者願一洒從祖從妹從兄之耻使文公之道取  
信於萬世也天耶命耶今何言哉某聞而悲之惟誦  
努力加餐飯無事長相見兩句以相勉今在建安書  
院與釋菜願梅庵枉駕訪之延至門下與之談論必  
有以契盛心者若信其非江南時文氣習則願以建  
安武夷書院山長或提督官待之亦扶持世道興起  
斯文第一義也

與劉秀岩論詩

詩於道最大與宇宙氣數相關人之氣成聲聲之精  
為言言已有音律言而成文尤其精者也凡人一言  
皆有吉凶况詩乎詩又文之精者也某辛未年為陳  
月泉序詩云五帝三王自立之中國仁而已矣中國  
而不仁何以異夷狄理之變氣亦隨之近時文章似

六朝詩又在晚唐下天地西北嚴凝之氣其盛於東  
南乎當時朋友皆笑之言幸而中此說有證先人受  
教章泉先生趙公澗泉先生韓公皆中原文獻說詩  
甚有道凡人學詩先將毛詩選精深者五十篇為祖  
次選杜工部詩五言選體七言古風五言長篇五言  
八句四句七言八句四句八門類編成一集只須百  
首次於文選中選李陵蘇武以下至建安晉宋五言  
古詩樂府編類成一集次選陶淵明韋蘇州陳子昂  
柳子厚四家詩各類編成一集次選黃山谷陳后山  
兩家詩各編類成一集此二家乃本朝詩祖次選韓

文公蘇東坡二家詩共編成一集如此揀選編類到  
二千詩詩人大家數盡在其中又於洪邃編晚唐五  
百家王荆公家次通選唐詩內揀七言四句唐律編  
類成一集則盛唐晚唐七言四句之妙者皆無遺矣  
人能如此用工時一吟詠不出三年詩道可以橫行  
天下天下之言詩者無敢縱矣其舊日選毛詩陶詩  
韋詩后山詩為劫火所焚今欲編類無借書之地江  
仲龍有劉果齋火前杜詩頗存某曾為校正今為阮  
二道士所執矣執事若有意謾借李杜陶韋黃陳文  
選詩隨得一種便發來當為揀擇必有一得可以備

風騷壇下奔走之未某今在書坊借得庵宇甚清幽  
秋冬無他往尚可來聽教有懷如海當與握手精談  
也

為蔡文節公子孫免差科書

某等輒有愚慮之一得仰禪教道之萬分切惟賢者  
不得見得見其象者可以崇之矣古之人不得見得  
見其似者可以續之矣范文正公守嚴州求嚴子陵  
之後而免租稅奉祠事者四家黃子畊守台州求謝  
上蔡之後給以田宅者數人余景瞻守南劍求楊龜  
山之後賜以室廬養以廩稍者十餘口皆明時士大

天盛德事也故家遺俗之昌微豈特與郡政有相關  
者斯文之興喪世道之污隆君子亦相覘之伏見先  
賢西山先生蔡文節公學貫天人道高百世師事朱  
文公最久文公敬之無以異於二程之尊康節也慶  
元學禁五十九人惟文節受禍最慘子孫最多賢人  
以為天道可信厥子節齋九峰二先生守父訓明師  
道以德行文學為東南師表厥孫覺軒以立言垂不  
朽父軒先生文肅公精忠大節尊主庇民使文公之  
道愈信於天下士大夫能讀文公書者多矣未有一  
門三世力扶道脉如蔡氏者家傳清白恒產本不多

其曾孫蔡某某自至元十三年歸附後遭貪酷轉運破其家又奪其田逃難江西近方還里田為橫民冒佃者半荒菜無人耕墾者半路官撥入馬站戶家有一物直錢則鬻以養馬今則無可鬻者矣皆為困窮民鄉人之善者大夫之賢者見之莫不流涕范文正之免租黃子耕之給田宅余景瞻之賜室廬廬稍不可望於今人矣切見文公門人能扶植道脉如劉文簡公黃文肅公之家皆蒙宣慰使薦舉省府褒表應有田產並免差科其已站戶而破產者並與分簡出站與儒戶一例優恤獨蔡文節公一門三世尊信

師道有功名教尤在諸賢之右特以孫孤弱寒窶不為當路達官貴人所知不得與劉文簡黃文肅兩家同沾清朝仁厚之澤豈非明世一闕事乎况蔡某等已係試中儒人必蒙優恤某等切聞師誨見義必為庸敢合辭鳴號於大夫君子之前欲望台慈備詞申呈建寧路總管府福建道行尚書府省乞賜指揮咨下建寧路建陽縣將蔡文節公家子孫充為站戶而產去稅存者特與分簡出站照文公門人子孫及儒戶體例除地稅商稅外並免一應差科予以扶持名教興起人心有關於三極之道甚大豈特儒家有所

勸獎知所趨向而已哉主張絀維是在師道不冒師  
尊下情不勝俯伏俟命之至

與天師張簡齋書

某介怙慈仁輒有忱懇聞右武夷一派士大夫尊道  
傳法者固多能推廣教主美意者寧幾人以某所見  
察之奉行正一教法的有契人行道濟物活人之功  
者惟建安周君震一君儒者也取祖告院先生乃一  
世名流趙愚菴信菴吳履齋徐意一余樵隱咸羅致  
門下為重宮建士黃魁以下習春秋者皆師之其學  
文質軒先生累膺旌幣逃名山林年六十四之精神

度如三十少年杜門謝客條然出塵望而知其為  
有道君子家在城府不妄友一人其遊建上一見如  
故交辱館繫于迎仙道院者兩旬因識其子孫八九  
人孝慈友悌一家之三代也持敬乃其家子晨夕事  
玉虛玄帝如嚴君婚友疾病難厄有祈焉如響斯答  
武夷觀阨於河西僧上下無敢出一手援持敬默禱  
之帝一夕僧感夢驚驚鳥獄遂散某遇夜朝斗忽見四  
人跨高馬而來一人黑衣披髮端坐於庭前乃玄帝  
也道士黃君亦熟視禮拜此持敬至誠所感召也持  
敬慕簡齋如天人隆師尊道一念真切行五百里而

辨香參禮儻蒙異賜而厚遇之如某受賜亦足以勸  
天下學道者意長紙短益重懷慕仰祈台照  
書

與道士桂武仲

某於建寧城中識周質軒先生有道之士近古之逸  
民也其人忠厚篤敬言不妄發人不妄交行不妄動  
猶有趙信菴王脩齋之風家在城府與時貴寓公士  
友無一人往來某不知何脩何飾獨蒙異顧館粲兩  
旬聽其議論挹其精神翛然出塵埃之外真可謂可  
與神遊八極之表者其令似周兄持敬少慕道教脩

真行法以濟活人為心一毫無所利捨宅為道院奉  
事玄帝如嚴君玄帝助之如父詔予感應神異不可  
一二數建邵得道者此其第一流也持敬平生以不  
登祖師正一玄壇不識簡齋天師真人為大欠行六  
百里持辨香參禮可謂盡心焉耳矣某既拜書簡齋  
不封蠟而經台覽持敬與某交通如兄弟望尊契兄  
留之門墻介之謁簡齋倘有所祈全賴吹噓將大與  
之力黃兄方外亦古君子其甚敬之并累造化惟仁  
賢留意焉

薦寫神黃鑑堂

某聞諸吳履齋其父吳正肅公題門榜曰寬著宵襟  
行好事大開庭戶納春風履齋強為善有大庇天下  
寒士心固無愧家學出正肅之門如徐意一者好賢  
樂善慈惠恢廓之風猶有傳也恃此有禱黃鑑堂丹  
青不減顧愷之間立本達官貴人多收之其人淳朴  
有古意不善干謁藝愈精而愈窮十三年来中國之  
衣冠盡變鑑堂鬻技不售是亦宋人資童甫而適越  
也寒餓之不恤時時袖先朝知名士詩卷示僕斬一  
辭前濯尾鬣或可增價於唐肆嗟乎東門種瓜南山  
射虎塗人皆得以躡躑豈能為鑑堂先容哉士窮易

為德半升水亦可活涸轍惟仁賢念之

與菊圃陳尚書劄

某揆時春到牡丹風明日健伏惟某官道隆德厚天  
相人懷台俟動止萬福漢人一月不見黃牀度鄙吝  
滿懷某問不至先生門下半年矣天下誰能有一言  
半辭以雪玉我哉某少日酷信書謂患難夷狄皆可  
行道辟世者卜丈夫也易居吾無才諧世吾無術茶  
然役役氛埃中武夷訪九曲龍虎訪仙岩秦人之家  
計猶在今而後知辟世者非小丈夫也日讀道家書  
頗有益不敢號於人曰吾慕安期生河上公梅子真

也獨怪荀陳兩家父兄弟皆名賢上關天象下係人望乃能免禍於漢魏之際使生於今世必以得道高人蒙繫維矣不知當時何以能自全顧先生教之某幼誦元公愛蓮說至晉人愛菊則疑何也呂不韋以菊花為季秋之候其說根於周訓又根於夏時三代聖人咸以此花為上品知味者不止一正則也晉人特好人之所好耳及觀文公書而信之狄梁公孤蹇獨航勳德無可疑周內史三字文公不可為賢者諱吾處士於是不可及矣晉人非愛菊也愛花之隱逸者也濂溪斯言正為陶靖節發也忠獻老圃靖節

三徑易地皆然先生可謂善自為謀矣萬世宗師非此時乎兒曹讀離騷突然問某曰菊英無零落露墜矣可飲乎小子惑焉某得一說而解之曰不蘭不常有得蘭露之墮者亦當飲之秋菊不常有得菊英之落者亦當食之愛之至敬之至也吾於是重有感焉賢者不得見得見其象者亦可嘉之矣古之人不得見得見其似者亦可續之矣良臣不得見得見其文行不失世守者亦可盡力張之矣某不才先文簡扶世衛道之志不可泯也先生之愛我也不徒與其潔直欲與其進安知其意不在斯乎此生得列乎衆芳



何敢忘滋蘭樹蕙之大造天行有消息易道無終窮  
康節不云乎苟有命世之才民雖夷狄三變而帝道  
可舉何嘗曰天下不可為海濱大老聞有善養老則  
歸之觀其所養者必先觀其自養先生之自養者厚  
矣某何敢為斯文致煩禱三山紫翠遠在烟靄無有  
間冠星佩霞窓雲閣霧者盛德之家也天上祥釐何  
所不備士而尊道役於紫炁老仙者非一人儻可使  
走也願後庚桑楚之後伏乞台照

疊山集卷之五

疊山集卷之六

序

送史縣尹朝京序

建陽號難治秋苗不滿九千石站戶不征輸者過半  
養新軍餘五百人郵卒不與焉邑當廣南江浙諸道  
之要會省官御史宣慰按察多行部鄰郡守貳多假  
途驛使將宸命來往煩廩庖者無虛日令尹迎必數  
十里外遇霖霖積潦瞻馬首倏至跪拜泥淖馬糞中  
移時不敢興馬上人命之退則退客就館用大牲小  
則割羊刺豕折俎充庭號白獻茶飯令拱手立堂下

三跪進酒上食客露頂跣坐必醉飽喜動顏色無不  
滿上馬去送必數里外而歸令尹對妻子舉酒相賀  
曰吾知免矣子事父臣事君不如是其嚴甚於阜隸  
之奉主人翁也為令尹者勞矣哉中原將家子史尹  
宰邑三年以寬平和易為政不求赫赫名民安之但  
見其可狎不見其可畏余隱者耳不聞理亂初不知  
史君何如人也癸未十月政和民不靖流毒千里平  
民無辜而死者幾萬人史君得龔遂對漢宣帝遺意  
人以為賊盜吾以為赤子人方治亂絲而焚之吾乃  
治亂繩而解之不殺一人而定會大赦閩浙更生者

何止百萬赦未至而寃死者亦多矣史稱活千人者  
子孫有封史君之後其昌乎既受代儻廬託妻子于  
此邑亦以士民依依不忍相捨也如京師謁吏部求  
祿以養母朋友載酒崇肉而餞之者五十人前期各  
賦詩余聞而出山謁之一見如舊識因道前朝四十  
年遺事宰相之仁鄙將帥之知愚軍民之苦樂兵財  
之多寡士大夫人品之高下史君無問不知如響斯  
答如養叔之射葉矢必中的庖丁之解牛刀必中窾  
偃僕丈夫之承綢累丸愈多而愈不失其錙銖聽之  
者心快神暢可喜可敬可憤可泣始知東南科舉士

誤天下蒼生者百年曾不如中原將家子不習時文  
者可與談天下事今人以作邑為勞宜乎史君但見  
其逸也余老且病矣只欠一死回思少年遇知己如  
忠齋劉公敬齋謝公梅石趙公則堂家公實堂吳公  
泉石青陽公皆待以國士期以遠業入仕二十一年  
居官僅八月宰相薦拔者十一人皆議論不合絕意  
浮世事退而尚友安期生梅子真遂為空壤間無用  
之物予之負知己多矣不知諸老先生存者幾人子  
遊中原過齊魯燕趙當歷歷為子問之宋希真云早  
年京洛識前輩晚景江湖無故人難與兒童談舊事

夜攀庭樹數星辰予每誦此詩未始不臨風洒淚也  
安得明敏卓犖之才如史君者日罄歎吾側哉朋友  
謂予舊有能詩聲當以詩為贈余方讀禮言且不成  
文豈能寫衢童壤老之真情乎有揚解者曰不載酒  
崇肉又不賦詩者罰余乃自罰為建陽士大夫餞令  
尹史君詩序

送方伯載歸三山序

景定二年司曆者曰星有天尾旅于奎填與辰從月  
後會四星不相能也乃季春月朔同軌其占為文運  
不明天下三十年無好文章儒者望清臺而詬曰何

物瞽叟為此妖言司曆者聞而笑曰豈特無好文章  
經存而道廢儒存而道殘科舉程文將無用矣皆疾  
其為妖言也後十六年而驗滑稽之雄以儒為戲者  
曰我大元制典人有十等一官二吏先之者貴之也  
貴之者謂有益於國也七匠八娼九儒十丐後之者  
賤之也賤之者謂無益於國也嗟乎卑哉介乎娼之  
下丐之上者今之儒也○○哀憐之令江南路縣各  
置教諭二人又用輔臣議諸道各置提舉儒學二人  
提舉既曰大有司設首領官知事令史尤繁學帑百  
羨鈔廩有羨粟歲磨時勘月稽日察有欺弊毫髮比

去之十年亦責償無赦饑雀羸鼠饒涎吐吞不敢啄  
鬻學官似尊貴實卑賤祿不足以救寒餓甚者面削  
如咽針如肌骨柴如嘈類啁啾相呼而謀曰我國朝  
治賊吏法最嚴管僧食僧管醫食醫管匠食匠御史  
按察不敢問豈不曰時使之然法使之然教之必不  
改比而誅之則不忍也吾徒管儒不食儒將坐而待  
斃乎椎肌刺肉於儒戶不足則括肉敲髓及鄉師滑  
稽之雄以儒為戲者又曰管儒者益眾食儒者益繁  
豈古之所謂獸相食者歟抑亦率獸而食人者歟儒  
不勝其苦逃而入僧入道入醫入匠者什九建安科

舉士餘二萬戶儒者六百儒貴歟賤歟榮歟辱歟可  
以發一慨也九仙方伯載三百年儒家一才子也幼  
登陳忠肅公門有遠志強記而善問落筆皆英氣薄  
科舉程文不為而喜為詩某每以科舉程文教子孫  
見後進學文者必勸之間語伯載曰以子之才屑為  
程文應儒選孰不貴重子伯載哆頤而笑掉臂而去  
曰吾始以先生為知我者也今而後知先生非知我  
者也馬之日千里者豈銜勒轡策所能羈哉吾人品  
豈在娼之下丐之上者乎吾豈不能為場屋無用之  
文所以膠口不肯道者願為大元一逸民超然出乎

士等之外也先生果知我者乎請從此辭某始而  
疑中而怪終而大敬之携其手坐之堂上而告之由  
辛酉至庚寅三十年文運大明今其時矣天下豈終  
無好文章乎古之所謂經天緯地曰文者必非場屋  
無用之文也子既薄場屋之文而不為文而經天緯  
地必有所傳矣安得借一席地相與講明之乎予方  
挾龜策坐卜肆豈得已哉是亦不願為儒者以予所  
不願而願子為之有愧於忠恕之道多矣雖然天地  
之大無儒道亦不能自立况國乎秦之後為漢媿儒  
者莫如漢帝尊儒者亦莫如高帝子能為董公為子

房為四皓帝必不敢以儒之腐者豎者待子矣安知以文章名天下者不在子乎安知使儒道可尊可貴者不自子始乎戊子四月甲子序

送黃六有歸三山序

積雪融而登徂徠可以觀松烈火息而登崑岡可以觀玉道行乎貧賤患難夷狄而不失其所守者可以言君子矣窮而能固者聖人所尚老而能壯者詩人所羨漢人合而言之曰窮當益堅老當益壯古之人有行之者太公是也仕而不選於侯國夫而見棄於室人傭而擯屠而市不利以八十老翁而仰食於魚

鉤不亦堅乎非龜筮文王亦不知其賢出奇策脫其主於囚人亦未敢以王佐許之閔光采韜鋒穎退然若無能者又幾年相三君定天下致太平年已百有餘矣辭三公而侯伯自暇自逸誰敢議之逆旅無嚴衛途人罄歎亦可通夜闌聞有云客寢甚安非就國者不俟昧爽攬衣宵行何其壯也秦漢而下將相亦有斯人否乎晚唐士大夫若能以憂道拯世之心易其嘆老嗟卑之心則唐之天下何至於亂亡羨光榮求一飽雖大賢亦不能免歐陽子悲之流弊數百年其禍不至於中國皆被髮左衽不止也嗟乎夷而滅

五帝三王自立之中國有天地以來無此變也同人者必辨其族類之可同隨時者必隨其正則無咎時文俗士盛年豈肯為匪人氣以窮而喪志以老而衰顛迷沉冥形生神死狷狷然曰我善同人我善隨時是不亦大可悲乎漢人堅壯之言有旨哉三山黃六有坐太學以文章為諸公貴人重客逢世大亂貧不能自活稍降心屈道為路教為山長為訓導官亦可自詭曰師儒囂囂然不屑携二子行五百里教學以代耕暇則歷訪先賢講習之所借書吟誦著述不休聞有好善而遺世者雖窮途巔崖邃谷必杖屨求見適某於途立談如莫逆交氣愈豪志愈不屈夜相與席地擁爐談太公大節六有拊髀雀躍若有契於心斯人也馬文淵之徒歟萬木彫殘喬榦猗翠礪嵬同爐缸氣燭天拙工族匠睥睨於其旁不以為奇亦當以為怪况天下後世豈無卞和公輸乎余懼六有不畏窮而畏老也敢以此說勉之予歸君子鄉見菊圃陳公芳山陳公及諸老先生與吾同志者道吾言豈不曰斯人也向來狂殺今尚狂乎丙戌建子月序

交信錄序

天下有達道不曰朋友而曰朋友之交交者精神有

契道德有同非外相慕也不交以朋友視君臣父子  
夫婦昆弟則疏矣易大傳曰定其交而後求定者見  
其心之可交也交亦豈易定哉公卿求士見其才不  
見其心能負人吾視魏侯崔廷尉悲之士求公卿  
見其勢不見其心能汗人吾視楊雄班固蔡邕笑之  
契之教人曰朋友有信孔門合交與信並言信而交  
交而信亦可以無悔矣同富貴相忘而有九官十臣  
同貧賤相踈而有仲尼弟子同患難相怨而有東漢  
黨人此謂交此謂信此朋友得以列於人倫也今人  
錄求交曰雲萍雲萍皆無情之物義已不信交何能  
堅請名之曰交信錄交無上下無貴賤無死生吾盡  
吾信不敢求諸人百年之間萬世之後倘能無愧天  
地謂之人始可見朋友之助始可言交信矣

程漢翁詩序

詩下而春秋不可續宇宙間一大變也程君漢翁出  
雲栖吟示某某誦懷古四詩涕泗交頤不能  
其言也悲乃其言也悲乃雀雖知天下尚有英才黍離之悲  
無衣之匪風下泉下思盡在是矣江此多豪傑吾  
有望焉因詩以見志漢翁所韞蓄所樹立所成就豈  
易量哉吾於是重有感焉藝祖最重讀書人雖超世



絕俗之才不由科舉程文奮身必不得行其志三百  
年後以學術誤天下者皆科舉程文之士儒亦無辭  
以自解矣某從先朝名將相遊泛論邊事自端平甲  
子至景定甲子儒以時文名而捐軀報國不畏鋒鏑  
至誠能使武夫心服為國家延數十年之命者僅得  
數節彭文子余我夫徐有功王景宋五人焉至有  
身歿死吾知國不可以為國矣漢翁勉稱陸宣公有  
言漢王之良佐皆季代之棄才在季而愚當與而智  
漢翁豈肯終為愚者乎後日天下英雄必有借漢翁  
為借漢翁者人之喜談樂誦又當過於五人者矣吾

之越敬起愛漢翁者不特詩道而止也

重刊蘇文忠公詩序

世由道作降有道如蘇文忠公竟為世所屈始熙寧  
訖靖康權爐消鑠勢浪摧壓身後難未歇也道無損  
世變何忍言淳熙天子尊先猷以勸臣節海內家有  
眉山書矣其文如靈鳳祥麟不必聖人然後識屢以  
詩得禍儒者疑焉同志以詩鳴於其言毋不敬信獨  
不與其詩異哉温涼寒暑有神氣而無形迹風人之  
詩也宇宙不多見獨不聞宣王幽厲之雅乎周人之  
免禍者幸公之得禍者不幸也詩固未易作識詩亦

未易也帝張咸池於洞庭鳥高飛魚深潛渝歌郢曲  
童兒婦女拊掌雀躍矣光嶽全氣震為大音泗古游  
今斯人幾見唐人誦杜子美詩必憐其忠公之詩獨  
不可憐乎公大節細行如秋月脫雲寒潭見底惜其  
道與程正公不同黨禍自此起賢者不相知果不可  
謂之命歟抑亦可謂之命歟為川洛學者兩怒交毀  
自陷其師我思聖賢以作汝民極相勉一念偏黨人  
心無所歸會矣民極將誰望邪小人剥君子夷狄盜  
中原二公亦不虞禍至此極也已公之道豈易及也  
哉元豐甲子自黃移汝有詞別交游功名富貴之念

澹然矣郡再火於秋季仲覽得其碧絹書者屢流落  
衢途皆儒家收之果有守護撝訶者耶過江興境上  
題名石壁麾筆墨淋漓竹上又不滅至今新篁葉  
有墨點爪之如煙煤蕃衍五步內移根易地則不生  
邦人愛之號曰東坡墨竹後有八十年余謫居富川  
親見二事嗟乎公乃天地間不可無之人其文亦天  
地間不可無者詩豈眾人所能識哉書市厄於火藝  
文四庫百無一遺好善者先刻東坡詩王呂而下章  
蔡而上以國事與公為仇者眾矣生平亦能詩文豈  
不工巧今人不借之齒牙公論果至是而定乎此謂

民彙此謂天道

贈地理楊南川序

楊君南川挾風水之術游富貴家老而不倦誦揚救貧所著三龍經極熟聽者欣然想其術之精也富貴家用其術不能去其貧楊君不色怨衝炎風濡梅雨杖筇竹行數百里鳴於人曰吾術能使貧者富賤者貴憂患者逸樂及遇富貴人家又不合而去何邪合不合無益損於楊君心勤而身困藝精而道窮世變使之然邪楊君之命固當然邪嗟乎古有負超世絕倫之才懷世天入神之志不為世用尚徒有來世

之名者多矣獨楊君乎哉吾聞南唐范太史游浙東三年不遇露香請命于窮旻願救貧民積善者十家至今兩浙名公卿數百年松楸鬱鬱有佳氣者皆范公所卜也楊君亦能有范公之心乎人不知之天必知之何憂乎不遇

觀音經序

西方聖人以好善為教多矣中國人無智愚賢不肖敬信觀世音如天如父母何也人窮必呼天疾痛必呼父母天與父母未必能救之也捨天與父母則無可鳴籲者矣今人見親戚朋友落坎窞坐困窳力

豐山集卷之六  
可以援而不援聞其鳴號之聲若不聞者皆是也觀  
世音獨以尋聲救苦自任不待人之鳴號於我尋其  
窮苦之聲而拯救之仁矣哉天與父母不能盡之仁  
觀世音盡之矣人之敬信觀世音如天如父母亦宜  
是心也豈特觀世音有之天下有溺者由已溺之禹  
之所思也天下有飢者由已飢之稷之所思也天下  
匹夫匹婦有不被堯舜之澤者若已推而內諸溝中  
伊尹之所思也禹稷伊尹之所思即觀世音之所尋  
也此道豈難能哉一念惻隱廣而克之仁不可勝用  
矣龍泉龔君某狀貌奇偉視瞻有力某一見知其非

庸人忽出觀世音普門品經一卷示某曰吾印此願  
與天下好善者共之嗟乎仁哉龔君之志乎禹稷伊  
尹之所思自此一念充之而已矣充之無窮百萬億  
蒼生墮巖崖受辛苦者皆可拯救苦聲何必尋苦海  
皆先登矣安知子非佛地位人乎勉之敬之吾猶有  
望

豐山集卷之七

里生潭石黃溥編

記

寧庵記

張仁叔葬本生母于邵武縣和平里之鶴巢原墓去  
 故廬百步有田四十畝歲收禾三百秤有蔬圃竹林  
 悉施以養蓮社報德堂佛者命周覺先主之擇其徒  
 一人守塚扁其廬曰寧庵今考妣二親而祠春秋薦  
 蘋繁寒食洒麥飯悉於田園收之守塚人執祀事如  
 法請張氏子孫主祭其為寧親謀亦遠矣仁叔垂涕  
 洩而告某曰子知寧庵之義乎予幼失怙恃本生母

義父收張氏孤教育之使成人本生母義父捐世子  
無以酬恩此庵之所以志予無涯之戚也予幼誦  
我詩未知其情之真惻今知之矣予之生親之所以  
劬瘁也予為赤子飲乳於親之懷者三年乳皆親之  
血也乳之盈涸由飲食之豐約勞苦不可言予為孩  
提親喜曰吾有兒矣拊之則察其肥瘠而欣憂畜之  
則俟其飢飽而飲食予能行可以免其提携矣長之  
則惟恐其氣體之不壯育之則惟恐其德性之不敏  
親行而予不隨顧之如有遺吾行而親不隨復之如  
有失其出也腹我而語之曰吾行矣汝在家毋登車

而臨深也其入也腹我而語之曰吾歸矣汝在家必  
無人念其飢飽寒燠也予漸長知學親心可以少寬  
矣憂其壯而未有室也既有室慮其子孫未能衆多  
也詩以妻子好合兄弟翕和而後父母之心順誠哉  
言乎予為貧衣食奔走親忍留之膝下離家則戒之  
謹慎父客則顧其速歸夢想其勞逸卜占其遠邇倚  
門閭而望聽烏鵲而喜精神常役役肝膽常懸懸也  
自予有生以來吾親之心無一日得寧者以予故古  
之人以生為勞以老為逸以死為息吾親老而未嘗  
佚今其息乎其心亦可以少寧乎詩曰欲報之德昊

天罔極終吾生無以報吾親言之則痛切思之則悶  
絕惟孝子仁人知棺美而槨厚土深而木密人謂吾  
親可以妥靈幽局矣予恐不足恃所恃守塚有其人  
守塚者不足恃所恃蓮社佛者為之主蓮社佛者不  
足恃所恃者有田園以養其生田園不足恃所恃造  
物有以鑒予之心予之報親者誠有罪予之思親者  
寔可閔昊天明明豈不能使吾親魂魂少寧乎子盍  
為我記之嗟乎孝矣哉仁叔思親之苦也人與天相  
去至遠者形也至近者心也一念之善人莫能知而  
天必知之一事之善人不能助而天必助之自今已

往甘露自當應其誠迅雷何忍驚其鬼燕或有增其  
土庶不敢觸其松虎狼亦能衛其墓況於人乎况於  
君家之子孫乎親可寧子之心亦可寧矣楊坊千家  
市習俗以市道相尚以詩書名家者皆異邦人擇鄉  
者不居吾屢觀仁叔之家晨昏一飯飲一蔬果未獻  
祖考不敢嘗田廬悉畀守塚者居茅屋聚數十學子  
終日嘈嘈教句讀疲神耗氣以養生事叔父母如事  
親愛堂弟如愛子吾知其為孝弟忠信人也問其師  
友則續溪楊公玉溪黎公學問有根源豈習俗所能  
移矣寧親一念天寔臨之某嘗執史筆當大書其事

俾後來傳孝友者有證天道有所托而明民極有所  
寄而立斯一扶世傳道一助也仁叔名子惠家在蒼  
峰下因以自號云

東山書院記

天子

年番陽李榮庭撰書辭託張國

賢彭汝翼來告謝枋得曰萬行先生趙公及其子忠  
定福王嚴事朱文公文公過其廬忠定長子崇憲師  
之忠定從弟汝靚有東山書院雲風堂乃萬行忠定  
兄弟教子孫之所題則文公筆也天下大亂汝靚之  
後寒飢濱於死終不以非道去貧書院遂為北胥徒

所有榮庭不忍見鬻常產倍償取之不敢曰吾廬設  
先聖燕居堂師友講習藏脩各有所規矩如國初四  
書院肄業則明體適用如湖學碩與天下英才共之  
俾文公之道大明於斯世萬行忠定之家學亦不絕  
矣子以為何如枋得曰夫哉李君之志也亦知學之  
有功於天地乎古之大臣能以道覺其君民者自伊  
尹始能以學勉其君民者自傳說始於國家若無所  
輕重也君不幸而有受之暴臣不幸而有文王之聖  
流風遺俗猶繫天人之心者百餘年八百國之精兵  
不能敵二子之正論武王太公凜凜無所容急以興



滅繼絕謝天下殷之後遂與周並立使三監淮夷不  
叛則武庚必不死殷之命必不黜殷之號位必不奪  
微子亦未必以宋代殷而降為上公也殷亡矣多士  
多方不服者三十年成王周公以忠厚之心消其不  
平之氣曰商王士曰有殷多士曰殷逋播臣未敢以  
我周臣民例而觀之矧敢視之如寇讎乎殷人何以  
得此於聖賢哉人紀不絕天地賴焉伊尹傳說之教  
隱然在人心者未泯也江沱漢廣之民一變為駛舌  
文王召公之道化何在後九百年一夫忠懷潔操以  
楚人之聲音而不失風雅之情性指天為正有殞無

他楚亡矣義陵一邑思楚逃秦隱居桃源者六百年  
子孫猶不與世接召南之教離騷之義吾於此見之  
我孔孟立教齊魯時曰吾將以扶持三極國人未必  
盡信也合天下精兵而不敢加一城之弦歌懸穹甍  
重祿而不能奪五百士之死義漢高帝雄心霸氣謂  
一世無人聞此二事為之駭愕為之涕泗孔孟之教  
與天地為無窮者固不止此此亦可以見其小驗矣  
自有天地以來儒道之不立至今日極矣李君方將  
求師講道為江左諸儒倡孰不迂之然而宇宙間無  
此迂七天地且不立况人乎由伊傅至孔孟窮達雖

不同其道皆有功於天地子知之矣枋得切有請焉  
今日師文公學孔孟者必自讀四書始意之誠家國  
天下與吾心為一誠之至天地人物與吾性為一夫  
人能言之手指目視常在於人所不見戒謹恐懼常  
在於已所獨知天下能幾人哉不心曠神怡於人所  
不堪之憂不去欲存理於視聽言動之隱語人曰舜  
之事吾可以有為四代禮樂吾可以自信舜與路不  
分於鷄鳴之善利人與禽獸不分於晝夜之存亡語  
人曰吾正人心即可成周孔吾知性善即可為堯舜  
孔孟六經之教萬世文公四書之助孔孟所望於天  
下英才者果如是乎嗟乎五帝三王自立之中國竟  
滅於諸儒道學大明之時此宇宙間大變也讀四書  
者有愧矣雖然達而行道者有負於孔孟學者所當  
戒也窮而明道者終無負於孔孟學者所當勉也榮  
庭祖仰高國賢祖介持皆以有道祠于學汝翼則薦  
行四世孫觀其志當有立於天下所學必進而未止  
也

圓峯道院祠堂記

非其鬼而祭聖人不許祀非族歆非類神與民同歸  
一愚上無祭法下無祭義難與衆人言矣許真君立

功江湖建邵壇上民營道院于圓峯山祠祭勤而誠  
吾不知其故隱君魏公創祠堂一區自有道院大家  
小民相祠基施財產竹木瓦石黃冠經始守靈瑣先  
後捨施有毫髮勤勞於斯者必祭朔望有齋饌晨夕  
有香燈如士大夫之奉家廟魏公屬余記其事客或  
譏之曰閩人祀許真君非古也以其驅龍蛇逐厲鬼  
有大造于民精神在天變化不可測時雨暘抃水旱  
民祈祥遠疾者應如響祀之可矣此祠無乃諂歟余  
曰不然而獨不聞盤庚之書乎曰胥及逸勤爾祖其  
從與享之為人臣而勤于王家先王必念之不忘天

子有大享必使之與享也曰古我先后既勞乃祖乃  
父繼之曰我先后綏乃祖乃父為人臣而勞於王事  
先王亦念之不忘在天之靈亦不忍相舍也人有勤  
勞於神之宮室者神其忘諸乎祭無小大咸曰報本  
猶有功禾稼則迎虎有功禾稼則迎此人情忠厚之  
至祭有法有義法否而義可三代聖人不能禁之矣  
神有功于民則祀民勤勞于神亦祀祠堂季世之古  
道也豈可以諂疑之哉吾因是重有感焉六蓼失國  
國人不自哀而臧文仲哀之曰臯陶庭堅不祀忽諸  
吾考其時臯陶子伯益有有後羸為強諸侯趙為晉

世卿終亦有國矣。蓼雖滅，臯陶祀未殄也。臧文仲悲傷惛惛，如疾痛之切，体膚使及。見秦滅趙，楚滅羸，其為臯陶哀當何如也。文武成康之宗廟而盡為禾黍，東遷君相曾不動念，心搖搖而不忍去，天悠悠而不我知。一行役大夫之外，無人矣。春秋臣子寧無豺獮之心乎？以老子之學尊其師，崇其教，能壯其宮室，又不忘先後勤勞之人，為人臣而念君父，能以觀公之心為心，臧孫可無哀黍離可不作天下事，何至如今日乎？祠堂歲月皆不書書，其作事有古道，俾忠臣孝子聞之，縱無忿心，亦有愧色。

### 擎天巖記

記曰：予宦遊東南州郡於山，則見衡岳之高且大，亦猶以為未見者西北耳。自謂高大之勢不兩立，豈意復有峩峩然峙於天半者，猶自謂偉，雖未獲班名志，載亦足見東南之峙，勢不孤，名山巨麓，惟建為寢，幔亭紫翠，乾坤之尸，縐萃焉。自賓雲之曲，不鼓魯孫無復夢虹橋矣。泛漁舟而覓桃花者，誰歟？閩之秦川有曠世高逸之士，姓祖諱道，悟深貶綺紈之習，力慕金宗之奇，參老瞿曇學法，西乾遂謀歸隱，蓋遊蜂之房不畜鴻鵠之卵，泠蹄之水不泄龍伯之宮，必有其山。

可與白毫紺相光芒高大而後以操蛇有靈導之蒼  
莽即天池而草創焉擎天之始立首其名而不與於  
志載未可憾有其實而不述其實之迹為可憾也或  
者謂王史無微曾記于茲歲月寢久六丁歸之山之  
僧暨鄉之士周有方復勾予記予以不敏辭之惜予  
身局偏方不得挹燕趙之勁氣以壯吾文閱肆斯言  
寧不有覩面目於司馬子長歟今車書一統玉帛會  
同向之未見者可見矣能附乎輿轍則馳穆王之駿  
周遊而歷覽之未為誇奈何駑駘之才不足以馳騁  
千里列鼎之味雖珍孰若採首陽之甘脆天地蟬蛻

萬物芻狗吾當出一言以警聾聵又安能以皎皎之  
白而濛世之溫蠖乎如是則身隱矣焉用文之斯文  
之所以作者良有以也夫崇岡萬仞過者閱者孰不  
敬服其高大之勢一日扞鼇不戴靈鳳高翔玉沈荃  
化久矣高山仰止渺然予懷覽方輿者又將何以耶  
嶽不生才山川俱捨諸否則移文山靈俾出良翰東  
蒞崑崙之墟西極崦嵫之頂環區宇而圖之奚止乎  
擎天一柱之可觀也疊山謝枋得撰

宋辛稼軒先生墓記

稼軒字幼安名弃疾列侍清班久歷中外五十年間

身事四朝僅得老從官號名稼軒垂歿乃謂樞府曰  
侂胄豈能用稼軒以立功名者乎稼軒豈肯依依胄  
以求富貴者乎自甲子至丁卯而立朝署四年官不  
為邊閫手不掌兵權耳不聞邊議後之誣公以片言  
雙字之文致其罪孰非天乎嘉定名臣無一人議公  
者非庸儒則詞臣也公論不明則人極不立人極不  
立則天之心無所寄世道如之何枋得先伯父嘗登  
公之門生五歲聞公之遺盛風烈而嘉焉年十六歲  
先人以稼軒奏請教之曰乃西漢人物也讀其書知  
其人欣然有執節之想乃今始與同志升公之堂瞻

公之像見公之曾孫多英傑不凡固知天於忠義有  
報矣為信陵置乎塚者慕其能其人也祭田掃墓而  
歎者感其進高能得士也謂武侯祠至不可忘思其  
有志定中原而願不遂也有疾聲大呼于祠堂者如  
人鳴其不平自昏莫至三更不絕聲近吾寢室愈悲  
一寺數十人驚以為神公有英雄之才忠義之心剛  
大之氣所學皆聖賢之事朱文公所敬愛每以股肱  
王室經綸天下奇之自負欲作何如人昔公遇仙以  
公真祠乃青兗也公以詞名天下公初卜得離卦乃  
南方丙丁火以鎮南也後之誣公者欺天亦甚哉二

聖不歸八陵不祀中原子民不行王化大讎不復大  
耻不雪平生志願百無一酬公有鬼神豈能無抑鬱  
哉六十年来世無特立異行之士為天下明公論公  
之疾聲大呼於祠堂者其意有所托乎枋得倘見君  
父當披肝歷膽以雪公之冤復官還職卹典易名錄  
後改正文傳立基道碑皆仁厚之朝所易行者然後  
錄公言行于書史昭明萬世以為忠臣義士有大節  
者之勸此枋得敬公本心親國之事亦所以為天下  
明公論扶人極也言至此門外聲寂然枋得之心必  
有契於公之心也以隻雞斗酒酬於祠下文曰嗚呼

天地間不可一日無公論公論不明則人極不立人  
極不立天地之心無所寄本朝以仁為國以義待士  
夫南渡後宰相無奇才遠略以苟且心術用架漏規  
模紀綱法度治兵理財無可恃所恃扶持社稷者惟  
士大夫一念之忠義耳以此比來忠義第一人生不  
得行其志沒無一人明其心全軀保妻子之臣乘時  
抵瞞之輩乃苟富貴者天下之疑此朝廷一大過  
天地間一大冤志士仁人所深悲至痛也公精忠大  
義不在張忠獻岳武穆下一少年書生不忘本朝痛  
二聖之不歸閔八陵之不祀哀中原子民之不行王

化結豪傑志斬虜馘挈中原還君父公之志亦大矣  
京孔公家比者無位尤能擒張安國歸之京師有  
人心天理者聞此事莫不流涕使公生於藝祖太宗  
時必旬日取宰相入仕五十年在朝不過老從官在  
外不過江南一連帥公沒西北忠義始絕望大讎必  
不復大耻必不雪國勢遠在東晉下五十年為宰相  
者皆不明君臣之大義無責焉耳

壘山集卷之七

壘山集卷之七



